

Ծամ իս թորգի

Ծամ իս թորգի էրան էրան,  
Խորոտիկ, հայ, խորոտիկ,  
Բոլոր էրես, պզտիկ բերան,  
Խորոտիկ, ջան, խորոտիկ:

Դու էլեր իս հալա հուլա,  
Խորոտիկ, հայ, խորոտիկ,  
Քու տոտիկներ ամպի քուլա,  
Խորոտիկ, ջան, խորոտիկ:

Քու ծամ քաշուկ Վանա ծովեն,  
Խորոտիկ, հայ, խորոտիկ,  
Կըշընկշընկաս արտի գովեն,  
Խորոտիկ, ջան, խորոտիկ:

Դու հոտոտ իս քանց մանուշակ,  
Խորոտիկ, հայ, խորոտիկ,  
Իգամ ձեր տուն, դառնամ մշակ,  
Խորոտիկ, ջան, խորոտիկ:

Աշուն էկավ, հելա գացի,  
Խորոտիկ, հայ, խորոտիկ,  
Խորոտ տուն չէր, նըստա լացի,  
Խորոտիկ, ջան, խորոտիկ:  
Խորոտիկ, ջան, խորոտիկ: